

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XLI No. 19
Oktubre 7, 2010
www.philippinerevolution.net

Editorial

Sikwayon ang rehimen nga US-Aquino

Wala na nagadulot sa pumuluyo ang “pagbag-o” nga salambiton pirme ni Benigno Aquino III. Makaligad ang 100 adlaw sa gahum, ang iya nga rehimen madasig nga nahublasan bilang papet nga rehimen nga wala sang kinalain sa mga nagligad nga reaksyunaryong rehimen. Sa atubang sang serye sang mga isyu nga naglupok sa una nga 100 adlaw ni Aquino sa Malacañang, nagaathag sa mata sang pumuluyo ang maki-imperyalista, elitista, manabaw, wala sang pulos, militarista kag garuk nga kinaiya sang pinakaubod sang iya rehimen.

Santo sa gin-areglo sang US nga kasugtanan nanday Aquino kag Gloria Arroyo, wala sang ginapakita nga kaseryosohan ang subong nga rehimen sa paglagas kay Arroyo sa daku nga krimen sini batuk sa pumuluyo. Ginpromisa ini ni Aquino para kuhaon ang suporta sang madamo, pero tubtob subong, ang solo nga nahimo niya tukuron ang Truth Commission para kuno mag-imbestiga. Nagaatubang ini subong sa madamo nga ligal kag iban pang sablag. Ginahatagan sini sang kahigayunan kag malaba nga tion sanday Arroyo para makahimo sang mga ligal, pulitikal kag iban pa nga maniobra para makalibre sa imbes-tigasyon kag pagsilot.

Isa ka bulan pagkatapos mabutang sa poder ang ila kapamilya, ginpahug, gintiplang kag ginsuhulan sang pamilya Cojuangco-Aquino ang mga

mangunguma kag mamumugon sa uma sang Hacienda Luisita para pagwaon nga may suporta ang ila madugay nga gimik nga Stock Distribution Option (SDO) para padayon nga malikawan ang pagpanagtag sang duta. Nagpakuno-kuno si Aquino nga wala sang labot sa mga padihot nga ini. Ginapakita lang niya nga wala siya sang intensyon nga isulong ang tunay nga reporma sa duta sa Hacienda Luisita kag iban pa nga asyenda sa bilog nga pungsod.

Ginahatagan niya sang dalan ang dugang nga pagpasilabot sang US kabaylo ang suporta nga pulitikal, ekonomya kag pinansyal sang US. Pabor siya sa todog-larga nga kontra-rebolusyonaryong interbensyon militar sang US kag sa pagpagamit sang pungsod bilang base sang dominasyon militar sang US sa rehiyon sang Southeast Asia kag Pacific. Pabor man si Aquino sa permanente nga pagpabilin sang mga tropa pangkombat sang US sa pungsod. Wala niya ginsunod ang pangako nga kkalon ang bahin sa Visiting Forces Agreement sang mag-atubang siya kay US Pres. Barack Obama.

Sa pihak sang mga pahayag niya para sa “kalinungan”, wala siya sang ginapakita nga seryosong interes sa pormal nga negosasyon pangkalinungan sa National Democratic Front of the Philippines. Sa baylo, naghimo siya sang kundisyon nga “untat-lupok” antes ang anuman nga pagsugilanon, nga labag sa The Hague Declaration kag iban



**Mga tampok sa
isyu nga ini...**

**Engrande nga
imperyalistang
pagpaniplang** PAHINA 3

**QC-CBD: Para sa
dumuluong, salot sa
pumuluyo** PAHINA 7

**5 lider mangunguma,
ginpatay sang militar**
PAHINA 11

pa nga kasugtanan. Ginasakuan su-bong sang mga upisyal pangseguri-dad kag militar ang ila pakitang-tawo nga “lokal nga sugilanon pangkalinungan” nga wala sang iban kundi pagsugilanon sang reaksyunaryong gubyrno sa kau-galingon mismo.

Duguon ang mga kamot ni Aquino sa iya pagmandu nga pala-wigon ang teroristang kampanya nga OBL sang nagligad nga rehi-men, samtang ginahanda ang kau-galingon nga bersyon sang kam-panya nga *counterinsurgency* (CO-IN). Nagapabungol-bungol ang re-himeng US-Aquino sa malaparan nga mga reklamo kontra sa lapna-gon nga wala sang hustisya kag paglapas sa tawhanong kinamata-rung. Indi magnubo sa 16 aktibista ang ginpatay sang mga armadong ahente sang estado halin sang magpungko sa poder si Aquino. Na-kakulong gihapon ang Morong 43 sa pihak sang wala unod nga kaso batuk sa ila kag sa atubang sang malapad nga pungsodnon kag pangkalibutanon nga mga pana-wagan para sa ila gilayon nga pag-hilway. Indi magnubo sa 388 pa nga mga bilanggong pulitikal ang padayon nga nagaantus sa mga

presohan kag kampo militar sa bi-log nga pungsod.

Kontra-rebolusyonaryo, neoli-beral, nagapakalimos kag kontra-pumuluyo ang badyet nasyunal nga ginhimo sang rehimeng US-Aquino para sa 2011. Pinakadaku nga alo-kasyon ang para sa pagbayad sang utang sa luwas. Halos doble ang badyet sang AFP para sa dugang nga pagtum-ok sa COIN. Ang bad-yet sang Department of Social Welfare and Development ang pinakadaku nga gindugang para magsanto sa disenyo sang US nga ipabilin ang pungsod kag nagaan-tus nga pumuluyo sa mga limos, amo man para mag-akto ini sang daku nga papel sa COIN.

Ginbuhinan man sang daku ang mga subsidyo sa mga mangunguma kag nagakunsumo sang bugas kag iban pa nga suporta sa agrikultura, mga pangpublikong kolehiyo kag unibersidad, mga pangpubliko nga ospital kag programa sa ikaayong lawas sa pinakaimol, programa pangbalay, sa ligal nga suporta pa- ra sa mga migranteng mamumugon kag iban pang malahalon nga pa-ngabuhian kag pangkatilingban nga kinahanglanon.

Lapnagon nga ginaduso sang

rehimeng Aquino ang dugang nga denasyunalisasyon, pribatisasyon, liberalisasyon kag deregulasyon sang ekonomyang Pilipino. Aktibo ini nga nagabaligya subong sang mga estratehikong industriya, pangpubliko nga yutilidad kag iban pa nga negosyo kag resorsa sa da-ku nga dumuluong nga negosyante. Mayor nga gin-asikaso ni Aquino sa pagbisita sa US ang pagbaligya sa daku nga kapitalista sang ginatos ka bilyon nga balor sang proyektong pribatisasyon, pamuhunan kag ne-gosyo sa pungsod, nga ginhimo nga makagalanyat sa pagpresentar sang dugang pa nga mga paglibre sa bu-his kag iban pa nga pribilehiyo.

Ginapalukdo sa pumuluyo ang pagkabangkarote sang gubyrno kag pagkaputo sang garuk nga serbisyo sini, kundi pati ang mataas nga ka-baylo sang pribatisasyon.

Subong nga Oktubre, magapa-taas sang sukot ang mga kumpanya sa tubig nga nagaserbisyo sa Metro Manila. Pataason man sa Nobyembre ang mga pasahe sa Metro Rail Tran-sit kag Light Rail Transit. Tuyo nga himuon ini nga makagalanyat sa mga pribadong mamuhunan.

Baliskad sa pangako, padayon nga nagapangita ang rehimeng US-Aquino sang mga kahigayunan nga magsukot sang dugang nga buhis sa pumuluyo. Ginplano sini nga magsukot sang 12% VAT sa *toll fee* sa mga *expressway*, pero napung-gan lang sang mabaskog nga pag-pamatuk sang pumuluyo kag mga kaso nga ginapasaka sa korte.

Nasaksihan sang bilog nga pungsod kag bilog nga kalibutan ang grabe nga wala sang ikasarang ni Aquino kag sang iya administra-syon sa pagpang-*hostage* sa Manila sang Agosto 23. Halin sa umpisa tubtob sa katapusan, puro kapal-pakan kag disorganisasyon ang nagluntad, nga naglab-ot sa pag-kamatay sang walo ka dumuluong nga turista kag sang nang-*hostage* sa ila. Lubos nga nabuyagyag ang



Tuig XLI No. 19 Oktubre 7, 2010

Ang *Ang Bayan* ginabantala sa leng-gwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.net

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa: angbayan@yahoo.com

Kaundan

Editorial

Sikwayon ang rehimeng US-Aquino	1
Imperyalista nga pagpaniplang	3
Pilipinas for sale	5
Jueteng, nakaugat sa garuk nga katilingban	6
Para sa dumuluong, salot sa pumuluyo	7
Demolisyon, napunggan	8
Kulang na, ginbuhinan pa	9

Madinalag-on nga TO

1003rd Brigade, ginsilutan	10
Kadalag-an sg 8ID, ginpanginwala	10

Pagpanghalit sang pasistang estado

5 lider mangunguma, ginpatay	11
80 adlaw, 8,000 biktima	12
Protesta para sa reporma sa duta	12

Balita	13
--------	----

Ang *Ang Bayan* ginabantala duha ka beses kada bulan
sg Komite Sentral sg Partido Komunista sg Pilipinas

kagarukan kag kainutilan sang nagaharing sistema kag sang administrasyong Aquino. Indi magnubo sa 10 upisyal sang pulisya kag gubyrno ang ginrekomentar nga pasakaan sang nagakaigo nga kaso. Sa amo man, wala gintumod sang komite nga nag-imbetigar ang mayor nga responsibilidad ni Aquino.

Nagnombrar si Aquino sang mga garuk nga upisyal sa iya kabinete kag iban pang mataas nga pusisyon. Sa kadam-an, ini kabayaran sa mga utang pangpulitika, labi na para sa tuman kadaku nila nga ginpuhanan sa iya kampanya sang eleksyon. Nagapabulag-bulag si Aquino sa pihak nga nagamurahag

na ang mga ginaumiran sang mga ini, lakip ang isyu sang *jueteng*. Ginapangapinan niya ang mga may sala kag iya ginasamaran ang mga nagabuyagyag sa ila. Sa madamo nga kontrobersya, nagahayag ang banggianay sang mga paksyon sa gubyrno kag pinakatampok sini ang pagkapihak-pihak, mahigko nga maniobra sa pulitika, mga kahinaan sang ehekutibo kag kapas-lawan sa pagdumala ni Aquino.

Sa ginapakita nga maki-imperyalista, maki-asendero kag kontrapumuluyo nga tindog ni Aquino sa mga isyu nga ini, pat-ud nga magadugang pa ang pag-antus sang pumuluyong Pilipino sa nabilin nga

tinuig sa idalom sang rehimeng US-Aquino. Subong sunud-sunod na nga nabuyagyag ang wala unod nga mga pangako ni Aquino kag ang pagkanabaw sang iya mga gimik sa pulitika, wala sang iban nga mapasilungan ang pumuluyo kundi maglunsar sang rebolusyonaryo kag militanteng paghimakas agud pangapinan kag isulong ang ila interes.

Pat-ud nga magabangon ang pumuluyo para batuan kag sikwayon ang mga kagarukan sang rehimeng US-Aquino kag sang bug-os nga nagaharing malakolonyal kag malapyudal nga sistema nga nagapaantus kag nagaulipon sa pungsod kag pumuluyong Pilipino. **AB**

Editoryal

Engrande nga imperyalista nga pagpaniplang

Gintalana sang United Nations sang tuig 2000 ang ginatawag nga Millennium Development Goals (MDG)—walo ka target para malubad na kuno ang kaimulon kag mga kaangut nga problema sang kalibutan paglab-ot sang 2015. Napulo ka tuig makaligad, maathag nga wala sang iban nga tunay nga tuyo ang MDG kundi magserbi nga dekorasyon sang neoliberalismo kag tabunan ang mapintas nga bunal sang imperyalistang globalisasyon kag agresyon.

Gintukod ang Millennium Challenge Account (MCA) bilang instrumento mismo sang imperyalismong US sa pagduso sang MDG. Ginagamit ang MCA para magpautang kag maghatag sang ayuda sa mga programa nga pangtapna kuno sa kaimulon kag manubo nga kalidad sang kabuhi sang pumuluyo sa imol nga pungsod. Ginahatag ang ayuda sa kundisyon nga ipatuman ang mga imperyalista nga polisiya sang pribatisasyon, liberalisasyon kag deregulasyon kag padayon nila nga pagabayaran ang ila mga utang. Ini man ang mga

polisiya nga pila ka dekada na nga ginaduso sang International Monetary Fund kag World Bank (IMF-WB).

Ang MDG isa subong sa mga instrumento nga ginagamit sang mga imperyalistang pungsod para ipabilin nga atrasado, indi industriyalisado, nagasalig na lang sa limos kag uyat sa liog ang imol nga pungsod.

Paagi sini, ginalihis sang mga imperyalista ang atensyon sang pumuluyo halin sa ugat sang ila kaimulon kag ginakambyo ini sa paibabaw lang nga mga talamdan sang kaimulon kag mga sosyo-ekonomikong problema. Sa amo man, padayon nga nagapandambong ang mga imperyalista samtang ginalingaw ang pumuluyo sa matayog nga target.

Tubtob nagahatag sang pangsapin sa gutom nga limos, labi pa nga ginahugot sang mga monopolyong kapitalista ang kontrol sa produksyon kag sistema sa suplay sang pagkaon sa kalibutan. Pareho sa Pilipinas, madamo nga pungsod subong ang nagasalig lang sa pag-import sang pagkaon, samtang padayon ang pagluntad sang daan nga pyudal kag malapyudal nga monopolyo sa duta, kag nagapatuyang ang mga dumuluong kag lokal nga kahimbon nila nga mga nagahari sa mga agribisnes, pagmina kag pagpangtroso.

Samtang nagalimos sang pondo para sa edukasyong primarya, nagabuhin naman ang



mga gubyrno sang badyet para sa pangpublikong edukasyon—kaba-hin sang “pagkinot” nga ginapapa-naog sang IMF-WB. Sa bilog nga ka-libutan, halos tunga sang pamatan-on nga dapat sa hayskul indi maka-eskwela. Kadungan sini ginaduso man ang pribatisasyon kag komer-syalisasyon sang edukasyon. Ginasi-guro ang mga eskwelahan magaser-bi sa paghorma sang mga tinawo nga suno sa mga kinahanglanon sang korporasyong multinasyunal.

Samtang nagatanyag sang mga libreng programa para sa ikaayong lawas sang mga iloy kag mga lap-sag, ginapabay-an naman nga ma-samad ang mga pangpublikong ospital kag pangkabilugan nga serbi-syo sa ikaayong lawas. Sa ngalan sang garantiya sa “kinamatarung sa intelektwal nga pagpanag-iya,” gi-namentenar sang mga imperyalis-tang kumpanya ang nagasinaka nga presyo sang mga bulong, gani ginatos ka milyon ang ginadingu-tan sang dapat masarangan nga bulong. Halos siyam ka milyon nga bata nga wala pa sang lima ka tuig ang gulang ang nagakalamatay tu-ig-tuig, mayormente bangud sa malnutrisyon, paglapnag sang mga balatian nga pwede naman mali-

kawan, kag wala sang limpyo nga tubig kag sanitasyon.

Samtang nagdeklarar nga kina-hanglan amligan ang kapalibutan, nagpakainutil ang MDG sa atubang sang mga pagpanghalit sang mga monopolyo kapitalista nga naka-sentro lang sa pagpandambong kag paghukhok sang superganansya. Wala hawid ang pagbuga sang mga makahalalit nga kemikal sang mga monopolyo kapitalistang kumpanya sa enerhiya, manupaktura, transpor-tasyon, industriyal nga agrikultura, pagmina, konstruksyon kag iban pa. Nagabunga ang mga ini sang peli-groso nga pagbag-o sang klima sang kalibutan kag nagapanghalit sa ka-buhi sang madamo nga pumuluyo.

Lubos na gid ang pagkasamad sang mga kabukiran, katubigan kag kadutaan sa kamot sang mga kum-panya sa pagmina, pagpangtroso kag iban pa nga mapandambong nga operasyon, nga may katuwang pa nga lapnagon nga pagpang-abu-so, pagpamwersa, pagpabakwit, pagsamad sa pangabuhian, kag iban pa nga paglapas sa kinamata-rung sang lokal nga populasyon.

Wala sang matuod nga tuyo ang MDG nga lubaron ang kaimulon, ka-gulutmon, lapnagon nga balatian

kag kagarukan. Ginabalewala man sini ang mga demanda para sa hus-tisya sosyal kag sandigan nga pag-bag-o nga ginaduso sang mga progresibong pwersa kag kahubla-gan sang pumuluyo sa bilog nga kalibutan. Sa pagkamatuod, ang MDG isa lang ka engrandeng padi-hot kag opensiba pangpropaganda sang monopolyo kapitalismo para balabagan ang mga pagsulong sang mga progresibong pwersa kag pumuluyo batuk sa imperyalistang globalisasyon nga neoliberal.

Ginatabunan sini ang mga im-peryalista nga gerang agresyon kag ang pagpatuyang sa mga resorsa, ang padayon nga pagluntad sang kolonyalismo kag neokolonyalismo, kag ang monopolyo kapitalista nga pagpanghimulos nga nagagapos sa tuman kadamong pungsod kag kadam-an sang populasyon sang kalibutan sa wala katapusan nga pagkaulipon kag kapigusan.

Katungdanan subong sang mga rebolusyonaryo kag progresibong pwersa sa bilog nga kalibutan nga ibuyagyag ang pagkapaltik sang engrande nga imperyalistang padi-hot nga MDG. Dapat pukawon ang kadam-an nga pumuluyo sa kalibu-tan sa pagpaniplang sang padihot nga ini, kag magtum-ok sang ila atensyon sa kinahanglanon sang de-saysibo nga kalubaran sa wala sang katarungan kag kapigusan nga na-kaugat sa garuk nga katilingban nga ginaharian sang imperyalismo.

Sa bilog nga kalibutan kon sa diin ang mga nagaantus, ginahika-wan, ginaulipon kag ginapigos nga pumuluyo, dapat lubos nga isulong ang rebolusyonaryong paghimakas kag lapnagon nga kahublagang ma-sa batuk sa imperyalismo kag reak-syon. Kinahanglan ang malaparan, todo-todo kag nagapadayon nga edukasyon, pag-organisa kag mobi-lisasyon sang mayorya sang pumu-luyo para sa pungsodnon kag kahil-wayan sosyal kag tanan-nga-bahin nga pag-uswag. **AB**

Walo ka punto sang pagpaniplang

Gintalana sang mga imperyalista paagi sa United Nations sadtong 2000 ang masunod nga mga target nga dapat kuno agumon sang mga pungsod tubtob 2015. Kaladlawan ang mga problema nga gus-to kuno nga lubaron amo mismo mga problema man nga padayon nga ginapalala sang neoliberal nga polisiya nga ginapapanog sang mga imperyalista sa kalibutan.

1. Tapnaon ang sobra nga kaimulon kag kagulutmon
2. Himuon nga unibersal ang primarya nga edukasyon
3. Sakdagon ang pagkaalalangay sa pagkatawo kag hatagan sang gahum ang kababainhan
4. Buhinan ang tantos sang pagkapatay sang mga bata
5. Pauswagon ang ikaayong lawas sang mga iloy
6. Pamatukan ang HIV/AIDS, malaria kag iban pa nga balatian
7. Siguruhon nga sustenable ang kapalibutan
8. Debeloparon ang pangkalibutanon nga pagbuligay para sa kauswagan

Pilipinas for sale

Daw sa negosyante nga desperado nga makabaligya, gindeklarar ni Aquino sa iya lima-ka-adlaw nga byahe sa US nga “bukas na ang Pilipinas para sa negosyo,” nga daw subong lang ini nagabukas.

Ginbaratilyo ni Aquino sa mga dumuluong nga mamuhunan ang mga programa kag proyekto sa idalom sang Private-Public Partnership (PPP) sang iya gubyerno. Ginagan-yat niya ang mga ini paagi sa mga insentibo sa buhis kag kon anano nga pribilehiyo. Ang PPP, siling ni Aquino, ang magaserbi nga mayor nga makina para sa pagpaandar sang ekonomya kag yabing sangkap batuk sa kaimulon.

Nagalab-ot sa \$17 bilyon ang balor sang mga proyekto sa idalom sang PPP nga ginabukas sang “rehimen sang pribatisasyon” sa mga dumuluong. Lakip diri ang proyekto para sa konstruksyon sang mga karsada, *airport*, sistema sang tren, produksyon sang kuryente, distribusyon sang tubig, irigasyon, pagtukod sang mga buluthuan kag iban pa. Napulo sa mga ini nga nagabalor sang \$4.5 bilyon ang ginlibod ni Aquino sa US. Ginlibod man ni Aquino ang mga *export processing zone*, *business process outsourcing*, turismo, pagmina, elektroniks, pabalay kag agrikultura.

Nagpakitluoy man si Aquino sa rehimeng Obama nga aprubahan ang Save Our Industries Act kag hatagan ang Pilipinas sang espesyal nga pabor sa pag-import sang US sang mga bayu nga ginatahi sa Pilipinas halin sa mga materyal nga lunsay magahalina sa US. Wala sapa-yan nga nagapabilin nga ikaduha nga pinakadaku nga eksport sang Pilipinas ang bayu, nagtibusok ini sang 67% halin sa pinakataas sini sadto pa nga mga dekada 1960-70. Wala sang \$1 bilyon kada tuig ang balor sang eksport halin diri.

Wala sapayan kag wala man sang kinatuhay sa mga nauna nga papet sang imperyalismong US ang

ginaangkon niya nga “mga kada-lag-an,” lubos kabugalon niya nga ginpadaku sa iya pagpauli ang kuno naagum niya sa mga bag-ong pangako sang pila ka korporasyong US nga magpasulod sang \$2.4 bilyon nga balor sang dugang nga puhunan nga magapatuhaw kuno sang 43,000 bag-ong trabaho sa masunod nga tatlo ka tuig. Pero daku nga bahin sang mga ini daan na nga nakatalana. Isa ka halimbawa sini ang tub-tob \$1 bilyon nga puhunan kuno sang AES Corporation nga igadugang sa maabot nga tuig sa Masinloc *coal-fired plant* sa Pangasinan para madoble ang kapasidad sini sa produksyon sang kuryente. Sa aktwal sad-tong 2007 pa ini gin-anunsyo.

Ginsaksihan man ni Aquino sa US ang pagpirma sang \$434-milyon nga ayuda halin sa Millennium Challenge Corporation nga halin man sa Millennium Challenge Account (MCA) sang gubyernong US.

Ang paghatag sang ayuda sang MCA may katuwang nga kundisyon para sa dugang pa nga pagpasilabot sang US sa ekonomya, pulitika kag militar sa pungsod, lakip na ang pagpatuman sang COIN sa ubay sang militar sang US. Wala man hayagan nga nakasaad sa mga kundisyon sang MCC ang mga “kontra-insurhensya” nga kinaiya sini, ang mga programa kag proyekto sang MCA hungod nga ginatumod sa mga erya kon sa diin ginadudahan nga mabaskog ang armado nga rebolusyonaryong pagbato sang pumuluyo. Sa Pilipinas, nakatumod ini pangunahon na sa mga lugar kon sa diin ginatantya nila mabas-

kog ang BHB.

Gintigana ang \$214 milyon, halos katunga sang pondo, para sa konstruksyon kag pagkumpunir sang 220-kilometro nga karsada nga magatahi sa bilog nga isla sang Samar kag magaangut sa 15 munisipalidad didto. Ginhatagan ini sang prayoridad bangud suno sa AFP, ang Samar isa sa mga isla nga may malapad kag malig-on nga base ang BHB, kag tuman kabudlay tabukon sang mga pwersa sang gubyerno bangud sa kakulangan sang mga karsada. Sa sini, malahalona sa pagpatuman sang programa ang “counterinsurgency” ang “paghawan” sa lugar kag paglatag sang mga karsada didto.

Katuwang ang AFP, ginapatuman na sang Department of Social Welfare and Development ang mga programa nga Kapitbisig Laban sa Kahirapan-Comprehensive and Integrated Delivery of Social Services (KALAHI-CIDSS) sa target nga mga baryo agud “pahumukon” ang mga residente sa ginatalana nga mga kampanya militar. Wala hawid-hawid ang AFP sa pagpahayag nga ang mga proyekto sang KALAHI-CIDSS kabahin sang “pagnyutralisa” sa mga lugar kon sa diin mabaskog ang BHB kag PKP.

Sadtong panahon pa sang rehimeng Arroyo, suportado na sang MCC, Organisation for Economic Cooperation and Development kag World Bank ang mga programa nga nagakumbina sa proyekto nga “kontra-kaimulon” kag “kontra-insurhensya” sa kaumhan. Isa sa mga mayor nga programa nga ginapon-dohan sini ang KALAHI-CIDSS. Sa pagbukas sang Oktubre, may ginaprubahan man ang WB nga pantang sa pungsod nga \$59.1 milyon para magamit nga dugang nga pondo para sa KALAHI-CIDSS. **AB**

Jueteng, nakaugat sa garuk nga katilingban

Pasulit-sulit ang paglupok sang isyu sang pagkalapnagon sang *jueteng* sa bilog nga pungsod. Nagalapos ini halin sa manubo tubtob sa mataas bangud sa pagsuporta diri sang korapsyon sa garuk nga gubyrno kag sa pulisya sini. Makapila ka beses na nga may mga imbestigasyon sini ang Senado kag Manubo nga Panalagan, kon sa diin ginbuyagyag sang maisog nga testigo ang pagkadalalihig sang mataas nga upisyal sang pulisya kag sang nasyunal kag lokal nga gubyrno.

Ginbuyagyag sini lang ni Arsobispo Oscar Cruz nga pila ka ta-wo nga malapit kay Benigno Aquino III nagabaton sang suhol nga P5-P8 milyon kada bulan halin sa mga opereytor sang *jueteng*. Nagatubang siya sa imbestigasyon sang Senado kag gintumod niya nga isa sa mga upisyal nga ini si Usec. Enrico Puno sang DILG. Siling ni Cruz, ginpalapitan man siya ni Antonio "Tonyboy" Cojuangco, pakaisa ni Aquino nga nagpuhunan sang daku sa iya kampanya, kag ginhambalan nga "maghinay-hinay" sa pagbuyagyag.

Ang mga ginbuyagyag ni Cruz kag sang iban pa liwat nga nagpatingkad sa halambalanon sang *jueteng*. Ginapakita ang lapnagon nga

operasyon sini kag kon paano ini ginpanginpulan sang mga garuk nga upisyal halin sa pinakamanubo tubtob pinakamataas nga andana sang burukrasya, sa kahalitan sang pumuluyo. Sa kahadlok nga matay-og ang iya nga rehimen, pilit subong nga ginpagamay ni Aquino ang isyu. Wala siya maghulag para kuhaon si Puno bisan maathag ang pagkaumid sini kag nagpahayag na ini nga magresayn.

Ang pagluntad sang lapnagon nga operasyon sang *jueteng* ispeho lang sang garuk nga nagahari nga sistema pangkatilingban. Bisin ginapadalagan nga iligal, indi matay-og ang operasyon sini bangud sa madalom nga pagkaumid kag pagbaton sang daku nga suhol sang mga upisyal sang gubyrno kag pulisya sa lainlain nga lebel.

Wala sang anuman nga maayo nga ginadulot ang *jueteng* kag iban pang sugal. Pareho ini sang droga sa nagaantus nga pumuluyo. Ginapanginpulan sang mga opereytor sang *jueteng* ang pagkalumos sa kaimulon sang pumuluyo kag ang paghandom nila nga mag-agom sang bisin temporaryo nga kasulhayan kabaylo sang pila ka piso nila nga patad.

Sistematiko nga nakaplastar kag nagalab-ot ang operasyon sini tubtob sa putuk-putok sang mga baryo. Sa kada baryo, dinosena ang mga kubrador ang hayagan na-

gakuha sang patad. Sila ang ginatos kalibo nga wala sang trabaho nga "ginaempleyo" sang *jueteng*.

Ginatantya nga nagaabot sang tubtob P38 bilyon ang tuigan nga kita sa operasyon sang *jueteng* sa bilog nga pungsod. May sistema sang pirme nga porsyentuhan sa tunga sang mga kubrador, kabo kag bolero tubtob sa mga opereytor, kag sa mga pulis kag puno sang lokal kag nasyunal nga gubyrno. Nagaabot sang tubtob P300 milyon ang tuigan nga ginabaton sang mga puno sang PNP kag DILG. Ginagamit man sang mga opereytor sini ang Small Town Lottery para taguon ang iligal nga pasugal.

Sa kadamo sang tinawo kag kalapad sang latag sini, daku ang papel sang mga opereytor sang *jueteng* sa mga eleksyon kag sa pagpadalagan sang gubyrno. Wala sang nagadugay nga upisyal sang gubyrno nga indi naumid sa *jueteng*.

Ang pagbato sa *jueteng* ginahimo sang rebolusyonaryong hublag paagi sa pasensyuso nga pag-organisa, pagpropaganda kag paghatag sang edukasyon sa pumuluyo, pagpataas sang lebel sang ila nga kultura, kag pag-agom sang mga kadalagan sa rebolusyong agraryo kag iban pa nga pamaagi sang pagpauswag sa pangabuhian sang pumuluyo. Labi pa nga malubad ang problema samtang ginaislan sang rebolusyonaryo nga demokratikong gahum ang daan nga garuk nga paghari kag napauswag na ang pulitika kag pangabuhian sang pumuluyo sa mga rebolusyonaryong erya.

Bisan pa man, bangud sa sistematiko kag madalom nga pagkau-gat sang *jueteng* sa garuk nga sistema sang katilingban, lubos nga makuha lang ini sa proseso sang rebolusyonaryong paghimakas kag desaysibo nga pagbag-o sa garuk nga sistema. AB



Para sa dumuluong, salot sa pumuluyo

Ang Quezon City-Central Business District (QC-CBD) amo ang programa pang-imprastruktura nga ginaduso sang mga imperyalista nga bangko para magserbi nga sentro pangkomersyo sang mga dumuluong kag lokal nga kapitalista ang isa ka estratehikong lokasyon sa Quezon City. Lubos ini subong nga ginapatuman sang rehimeng Aquino, sa pihak sang tuga sini nga kahalitan sa pangabuhian kag kabuhi sang mga imol nga nagapuyo sa malapad nga duta nga sakupon sang proyekto.

Plano sang World Bank. Ang World Bank (WB) ang nagplastar sang plano para sa pagtukod sang QC-CBD sang 2005 pa. Imbolbado man ang Asian Development Bank, kag ginkontrata ang ALMEC Corp. sang Japan para kumpletuhon kag detalyehon ang plano. Nagabalar ini sadto sang \$3 bilyon. Kabaylo sang pondo halin sa WB, direkta sini nga ginapasilabtan ang proyekto sa paghatag sang laygay bahin sa mga polisiya, teknikal nga bulig kag suporta sa kapital.

Sang 2007, ginpagwa ni Gloria Arroyo ang Executive Order 620 nga nagasaad nga sakupon sang QC-CBD ang halos 250.6 ektarya nga kadutaan nga nagasakop sa East kag North Triangle kag Veterans Memorial Medical Center. Ginsakop man sini ang mga duta sa Quezon City Circle, Quezon Avenue kag pila ka lugar sa kampus sang University of the Philippines (UP)

nga una na nga ginpaarkilahan sa mga dumuluong nga kumpanya.

Plano nga tukuron sa QC-CBD ang daku nga bilding para sa mga negosyo, bangko, kondominyum, iban pang puluy-an, pribado nga upisina kag institusyon, *call center* kag pasyalan pang-turista.

Ang QC-CBD magaserbi nga sentro sang pangkalibutanon nga komersyo kag negosyo pareho sang Ayala Commercial Center kag iban pa nga sentro pangnegosyo sa pungsod. Mangin sentro de grabidad kuno ini sa Metro Manila kag makaganyat sang malapad nga balaligyaan bangud sa pagkastratehiko sang lugar.

Panginpuslan sang daku nga kumprador kag burukrata kapitalista. Daku nga burges kumprador ang mayor nga makabenepisyo sa QC-CBD. Lakip sa mga ini ang mga Ayala Holdings Inc. nga nakabakal sang 29.1 ektarya nga bahin sa North Triangle sa balor nga P22 bilyon. Nakuha man sang pamilya Gokongwei (Robinsons Land Corporation) ang 15 ektarya. Si Lucio Tan man may ginatantya P15 bilyon para sa QC-CBD. Padayon man nga ginapalapad ni Henry Sy ang iya SM City sa North Avenue, antes pa nagsulod ang mga Ayala kag iban pang daku nga kapitalista.

Nauna na nga nakabenepisyo

ang New San Jose Builders Inc. (NSJB) nga nakakontrata sa NHA para okupahan ang bahin sang North Triangle sa balor nga P50 milyon. Nagtukod ini sang terminal sang mga salakyan kag planta sang mga materyales pangkonstruksyon nga wala nagbayad sa NHA.

Ang NSJB ginapang-iyahan ni Jerry Acuzar, bayaw ni Executive Sec. Pacquito "Jojo" Ochoa, nga nagserbi sadto nga *city administrator* sang Quezon City. Si Feliciano Belmonte man, nga meyor sadto

sang Quezon City, nangin kasosyo sa koleksyon sang basura sang NSJB kag nakabenepisyo man sa *sidewalk project* sa Quezon City Hall. Ang NSJB man ang nagbakal sang lupa sa Montalban, Rizal kag nagtukod

diri sang mga balay nga pagahulugan sa mga saylunon didto halin sa North Triangle.

Pagpalayas sa mga imol. Magalab-ot sa 24,500 pamilya sa nasambit nga mga lugar ang madalasa sang nasambit nga proyekto. Pila na ka balay ang naguba kag ginpatindugan sang mga komersyal nga bilding pareho sang Trinoma sa North Avenue. Naglunsar sang serye sang mga operasyon ang Metropolitan Manila Development Authority (MMDA) para hawanan ang mga bangketa sa bahin sang North kag East Triangle. Samtang, gintukod ang UP-Ayala Technohub sa bahin sang Commonwealth Avenue sa UP-Diliman sa pihak sang pagpamatuk sang mga tumuluon kag manunudlo.

Hugot nga ginapamatukan ang proyekto nga ini sang Kalipunan ng Damayang Mahihirap (KADAMAY),



Confederation of Unity for the Recognition and Advancement of Government Employees (COURAGE) kag magagmay nga negosyante. Suno sa KADAMAY, ang QC-CBD para lang sa daku nga kapitalista kag kumprador kag salot sa mga imol. Tabugon lang sini ang mga imol sa ila nga mga puluy-an kag waskon ang ila nga pangabuhian.

Ginapamatukan sang KADAMAY ang plano nga relokasyon sang mga imol sa Montalban bangud ginapalayo sini ang mga residente sa ila nga palangabuhian kag eskwelahan. Wala man sang maayo nga serbisyo sang tubig kag kuryente didto. Mahina nga klase ang mga balay nga gintukod didto kag ginabaha ang lugar. Gamay ang ginahatag sa kada pamilya nga sayluhon didto--P1,000, 5 kilo nga bugas, pila ka delata kag pakete sang *noodles*. Pati ang mga pabalay sa relokasyon indi libre kag kinahanglan bayaran sang halin P300 tubtob P1,000 kada bulan.

Suno sa KADAMAY, kadam-an sang ginasiling sang NHA nga 3,000 pamilya nga nagkadto na sa lugar sang relokasyon napilitan magbalik sa North Triangle bangud sa wala sang palangabuhian sa ginsayluhan. Ginaduso sang KADAMAY nga kon kinahanglan nga may ara sang relokasyon, ini dapat sa sulod sang Quezon City para indi malayo ang mga imol sa ila nga trabaho, eskwelahan kag pangabuhian.

Pagsaylo sang mga upisina sang gubyerno. Para hatagan dalan ang pagtukod sang mga imprastruktura para sa mga dumuluong nga negosyo, pati ang pila ka upisina sang gubyerno pagasayluhon sa ginatawag nga National Government Center sa Batasan Hills. Lakip sa mga target nga sayluhon ang mga upisina sang National Housing Authority, Sugar Regulatory Administration, Bureau of Internal Revenue kag di mag-nubo sa 10 pa nga mga ahensya.

Demolisyon sa North Triangle, napunggan

Madinalag-on nga napunggan sang ululupod nga paghulag sang mga residente sang Sityo San Roque, Barangay Bagong Pag-asa sa North Triangle sa Quezon City ang demolisyon sang ila nga mga balay nga gintilawan nga ipatuman sang mga tinawo sang National Housing Authority (NHA). Ang mandu sang demolisyon ginhimo ka-angut sang pagpatuman sang programa nga QC-CBD.

Septyembre 22 pa lang nag-umpisa sa nga magbarikada ang mga residente. Nagsindi sila sang mga kandila sa gwa sang ila nga mga balay. Ang iban nagpulaw bilog nga gab-i para pungan ang pagsulod sang mga pulis kag *demolition teams* sang NHA. Ang iban naghimo sang mga pangpugong sa ila nga mga puluy-an. Padayon man nga naglunsar sang mga pulong masa kag talakayan bayan para ipaathag ang importansya nga pangapinan ang palangabuhian sang imol kag batuan ang demolisyon.

Pagkaaga, ululupod nga naghulag ang mga residente para pungan ang demolisyon. Nagguwa sila sa ila nga mga puluy-an kag nagbarikada sa dalanon. Naglab-ot sa Epifanio Delos Santos Avenue (EDSA) ang ila nga pagtipon. Nag-uyatanay-kamot kag nagbutang sila sang mga balabag para pungan ang pagsulod sang mga pulis.

Nag-ibwal ang kalakasan sang magpamilit ang mga tagademolis nga waskon ang ila nga balay. Ang pila ka pulis nagpangtaya sang pusil para pahugon ang mga residente.

Ginbomba sang tubig ang mga nagbarikada. Pito ka residente ang napilasan kag duha ang gin-aresto. Napilitan ang mga residente nga habuyan sang mga bato ang mga tinawo sang NHA para pungan ang pagpangwasak sa mga balay.

Mga alas-3 sang hapon, nagpaguwa ang Regional Trial Court Branch 226 sang Temporary Restraining Order (TRO) para temporaryo nga untaton ang demolisyon. Bisan si Benigno Aquino III nga sadto ara sa US napilitan nga manduan ang NHA nga untaton anay ang demolisyon. Padayon man nga magabantay kag pungan sang mga imol ang anuman nga pagtinguha nga idemolis ang ila nga mga puluy-an.

AB

May paandam man nga maapektuhan ang kampus sang Philippine Science High School. Ang mga bilding kag lupa nga ginatindugan sang mga ini paarkilahan o di gani ibaligya sa pribadong kapitalista.

Sandig man sa programa nga "medical tourism", sige-sige nga ginaplano ang pribatisasyon sang mga ospital sa lugar, lakip ang National Kidney Institute, ang Lung Center of the Philippines, Philippine Heart Center, Veterans Memorial Hospital kag Philippine Children's Medical Center. Subong pa

lang madasig na nga nagtaas ang balor sang serbisyo sang mga ospital nga ini lampas sa ikasarang sang imol nga mga pumuluyo.

Nagapamatuk ang mga organisasyon sang mga empleyado sang gubyerno sa QC-CBD bangud ginawana sini ang interes sang mga dumuluong nga negosyo sangsa pagserbisyo sa pumuluyo. Nagakabalaka man sila nga ang pagsaylo sang mga upisina mangin kabangdanan para sa malaparan nga pagpahalin sang mga empleyado sang guberno.

AB

Kulang na, ginbuhinan pa

Ginbuhinan sang rehimeng Aquino ang haluson nga badyet para sa edukasyon. Liw-as ini sa ginapabugal sini nga himuon nga prayoridad sang rehimen ang edukasyon.

Nagtigana ang rehimen sang P23.4 bilyon lang para sa 112 pangpubliko nga unibersidad kag kolehiyo para sa tuig 2011. Mas manubo ini sang 1.7% kumpara sa P23.8 bilyon nga badyet para sa 2010.

Direkta nga ginpahayag ni Pres. Benigno Aquino III nga amat-amat sini nga buhinan ang subsidyo sa edukasyon para itulod ang mga pangpubliko nga unibersidad kag kolehiyo nga magpatuhaw sang ila nga pondo. Wala ini sang iban nga padulungan kundi ang labi pa nga komersyalisasyon kag pribatisasyon sang mga pangpubliko nga eskwelahan sa pungsod.

Pinakadaku ang ginbuhin sang gubyernong Aquino sa mga badyet sang University of the Philippines (20.11% o P1.39 bilyon), Philippine Normal University o PNU (23.59% o 91.35 milyon), Aurora State College of Technology (22.21%), Cerilles State College (21.95%) kag University of Southeastern Philippines (20.03%).

Nagaabot naman sa P88 milyon o 18.82% ang ginbuhin sa Bicol University. Sa bag-o nga ginpagamay nga badyet, wala sang alokasyon para sa mga bag-o nga kaga-

mitan kag sa pagkaayo, konstruksyon kag pagpauswag sang mga pasilidad.

Suno sa Kabataan Party, nagtimbuok ang pondo nga ginpatuhaw sang mga pangpubliko nga unibersidad kag kolehiyo halin P1.16 bilyon sang 2000 pakadto sa P7.78 bilyon subong nga tuig kag diri na nagahalin ang nagapadaku nga bahin sang ila panggastos. Suno sa datos sini, 6.6% lang sang mga badyet sang mga pangpubliko nga unibersidad kag kolehiyo ang nagahalin sa mga tumuluon sang nagligad nga dekada. Subong, nagaabot na sa 22.1% sang ila badyet ang halin sa bulsa sang mga estudyante bunga man sang pagtaas sang matrikula kag iban pa nga mga balayran. Suno sa National Union of Students of the Philippines (NUSP), sa kabilugan nga pondo sang mga pangpublikong kolehiyo kag unibersidad nagnubo ang porsyento sang pondo nga naghalin sa gubyerno halin 87.74 % sang 2000 pakadto 67.35 % subong nga tuig.

Walkout sang mga tumuluon. Ginpamunuan sang NUSP ang *walkout* sa pungsodnon nga adlaw sang paghulag sang pamatan-on kag es-

tudyante sang Septyembre 24 bilang protesta sa pagbuhin sa badyet sa edukasyon.


Sa Metro Manila, ginatantya nga 1,500 estudyante ang nag*walkout* sa ila mga klase. May dulongan nga paghulag man ang mga kabataan kag estudyante sa Baguio, Ilocos, Central Luzon, Los Baños, Bicol, Tacloban, Iloilo, Bacolod, Cebu kag Davao. Ginsuportahan sang Anakbayan-Los Angeles, USA ang paghulag sa Pilipinas.

Sa Maynila, ginpamunuan ang *walkout* sang mga tumuluon sa UP-Diliman, UP-Manila, Polytechnic University of the Philippines kag PNU. Nakig-isa man sa ila ang pila ka pangpribadong eskwelahan kag grupo nga League of Filipino Students, Student Christian Movement kag Anakbayan.

Nagtipon sila sa University of Santo Tomas kag nagmartsa pakadto sa Mendiola. Isa ka *effigy* ni Aquino ang ginsunog sang mga estudyante sa Quiapo. May barikada ang mga pulis sa lugar kon sa diin nagbutang sila sang *barbed wire* para pungan ang mga estudyante nga magderetso sa Malacañang.

Protesta sa Batasan. Sining Oktubre 5 man, naglunsar sang protesta ang mga estudyante sa pagpamuno sang NUSP sa sulod mismo sang entablado sang Kongreso. Ginpahayag nila ang grabe nga kaakig sa pagbuhin sa gamay na nga daan nga badyet sa edukasyon.

Gilayon nga ginpauntat kag ginpagwa sang mga gwardya sang Kongreso ang mga estudyante. Pagguwa nila, ginsug-alaw sila sang kapareho nga mga estudyante nga may aksyon protesta naman sa pwertahan sang Kongreso. **AB**





1003rd Brigade, ginsilutan sang BHB

Naglunsar sang mga operasyon harasment ang mga yunit kumando sang 1st Pulang Bagani Company (1st PBC) sang Bag-ong Hangaway sang Banwa sining Oktubre 5 batuk sa *patrol base* sang 1003rd Brigade sang 10th ID sang Philippine Army sa Paquibato Proper kag Paradise Embac. Pila ka adlaw antes sini, ginharas man sang Pulang gerilya ang nasambit nga mga tropa sang militar sa Baryo Fatima sang Septyembre 30. Pareho nga ara sa Paquibato District sang Davao City ang nasambit nga mga barangay.

Ginlunsar sang 1st PBC ang mga aksyon militar nga ini bilang pagsilut sa mga pagpang-abuso sang mga suldado sang 1003rd Bde. Ang mga tropa nga ini amo ang ginpakat sa nasambit nga mga erya para siguruhon nga wala sang upang sa eksplorasyon sang mga kumpanya sang mina. Umpisa sang nagligad nga tuig may nakasalang nga 11 aplikasyon sa pagmina sa masobra 95,000 ektarya sa Mines and Geosciences Bureau. Sakop sini ang bugana sa mineral nga kabukiran sang Davao City, Davao del Norte kag Bukidnon. Masobra tunga sang mga aplikasyon nga ini ara sa Paquibato District.

Para pahipuson ang mga nagapamatuk sa malaparan nga pagmina, naglunsar sang wala untat nga mga



operasyon pangkombat ang 1003rd Bde. Sa sulod lang sang isa ka bulan, sobra 1,000 na ang biktima sang militar. Lakip sa mga biktima ang ginpatay nga mga sibilyan nga sanday Julius Tammundes kag Reynaldo Labrador.

Bilang sabat sa ginapangayo sang pumuluyo, naglunsar ang 1st PBC sang 10 ka taktikal nga opensiba batuk sa 1003rd Bde halin Hulyo tubtob Septyembre.

AB

Kadalag-an sang 8th ID, ginpanginwala sang BHB

Ginpanginwala sang Efren Martires Command (EMC) sang Bag-ong Hangaway sang Banwa (BHB) sa Eastern Visayas ang ginasing nga kadalag-an sang 8th ID sang Philippine Army sa atubang sang pagkalutos sini sa mga taktikal nga opensiba sang BHB.

Ginpabugal ni Maj. Gen. Mario Chan, hepe sang 8th ID, nga nakaagaw kuno ang militar sa Samar sang mga abandonadong kampo sang BHB, kag tuga sini, nagaatubang ang mga rebolusyonaryo nga pwersa diri sa pat-ud nga pagkalutos. Suno kay Ka Karlos Manuel, tagapamaba sang EMC, wala sang ipabugal ang militar bangud bilang isa ka hangaway nga gerilya, wala naman sang mga permanenteng base ang BHB.

Sa kamatuoran, ang pagpahambog nga ini sang militar pagpangtakop sa malala nga pagkalutos sini sa BHB kag sa mabaskog nga pagbato sang rebolusyonaryong pumuluyo. Sa katapusan, ang kadalag-an sa kada inaway halambalanon nga ginahusgahan sang kon sin-o ang suportado sang pumuluyo kag indi sang kon ano kadaku ang armadong kusog, siling sang tagapamaba sang EMC.

Base sa pauna nga mga pahayag nga nakalap sang EMC halin sa mga prenteng gerilya, naglunsar ang BHB sa rehiyon sang 51 taktikal nga opensiba batuk sa mga tropa sang 8th ID, mga pulis kag iban pang armado nga gaway sang reaksyunaryo nga gubyrno halin Enero tubtob Septyembre. Nagdulot ini sang 74 nga patay kag 25 pilason sa bahin sang kaaway samtang ang BHB nag-agom sang 10 patay kag anom ang pilason. Nakaagaw ang BHB sang 18 armas.

Nagmadinalag-on ang mga taktikal nga opensiba nga ini sa pihak sang indi hamak nga mas daku nga pwersa sang reaksyunaryong gubyrno.

Sa pihak sang 239 dugang nga suldado sang 8th ID nga gintambak sa tatlo ka prubinsya sang Samar, kumpanyansado ang BHB nga makapangibabaw ini indi lang bangud sa angkon sini nga armadong kusog kag paggamit sang husto nga estratehiya kag mga taktika, kundi bangud sa nagapadayon nga pagsakdag sang pumuluyo. Siling sang EMC, wala ini nagakabalaka sa kaugalingon kundi sa pumuluyo bangud sigurado nga magalala ang mga kaso sang paglapas sa tawhanong kinamatarung batuk sa mga sibilyan bunga sang pagdagsa sang dugang nga mga suldado.

AB

5 lider mangunguma, ginpatay sang militar

Padayon ang pagpamatay kag pagpang-ipit sa mga lider kag aktibista sang mga progresibong organisasyon sa idalom sang rehimeng US-Aquino. Lima ka lider mangunguma ang pinakaulihi nga biktima sang ekstraduhisyal nga pagpamatay halin Septyembre tubtob una nga simana sang Oktubre. Wala man sang untat ang harasment sa mga personahe nga kritikal sa gubyernong Aquino.

Oktubre 1. Ginpatay sang militar si Rene "Toto" Quirante, 48, isa ka lider mangunguma sa Sityo Amomoyong, Barangay Trinidad, Guihulngan City, Negros Oriental. Si Quirante ikaduha nga pangulo sang KAUGMAON, katapu sang Kilusang Magbubukid ng Pilipinas (KMP). Ika-14 nga biktima na siya sang ekstraduhisyal nga pagpamatay sa idalom sang administrasyong US-Aquino kag ika-41 biktima sang pangpulitika nga pagpamatay sa isla sang Negros.

Nagatambong sadto si Quirante sa isa ka konsultasyon sang mga mangunguma kag nagtulog siya sa balay ni Romeo Gador sa Sityo Amomoyong sang magsalakay ang 30 suldado sang 11th IB bandang alas-2 sang kaagahon. Ginguyod nila pagwa kag gintortur sanday Quirante kag Gador.

Tatlong beses nga ginluthang si Quirante sa ulo samtang ginbuhian si Gador, suno kay Fred Caña, pangkabilugan nga sekretaryo sang Karapatan-Negros. Madamo ka beses nga gintuyo patyon si Quirante kag nagpangayo na gani siya sang bulig sa meyor kag konseho sang Guihulngan. Sang 2007, siya ginpreso bangud sa himu-himo nga kasong rebelyon pero ginbuy-an man matapos ang isa ka bulan kag tunga bangud sa wala sang ebidensya.

Septyembre 24. Ginaresto kag gintortur sang mga elemento sang

39th IB si Eliseo "Ka Bimbo" Tada, isa ka Pulang hangaway nga may malala nga balatian. Gindakop siya sa Datu Danwata, Malita, Davao del Sur samtang ginadala sa ospital. Matapos siya madakop kag gintortur ginpresentar siya sa midya bilang surenderi kag ginpaako nga nakapartisipar sa isa ka taktikal nga opensiba sang BHB sa Akboal, Upper Suyan, Sarangani sang Septyembre 21. Imposible ini

bangud sa kalayuon sang lugar halin sa gindakpan sa iya kag sa kalubhaon na sang iya balatian.

Septyembre 23.

Gintampalas sang militar ang mga bangkay sang lima ka aktibista nga napatay sang mabunggo ang ila salakyan sa isa ka 10-wheeler truck sa Piggatan, Alcala, Cagayan. Napatay sa aksidente sanday Salvador Doni-ego, Benedicto de Leon, Ileen Robles kag duha nga wala pa nakilala, samtang duha pa ka upod nila ang napilasan sang malubha. Tanan sila mga myembro sang Anakpawis sa Cagayan Valley. Makaligad nga akusahan sila mga myembro sang BHB, wala gin-asikaso ang mga bangkay kag basta na lang ginhilera ang mga ini sa likod sang munisipyo sang Alcala. Wala man ginpasugtan sang militar ang mga himata sang mga pilasan nga makadtuan sa ospital.

Septyembre 21. Ginharas sang militar si Kelly Delgado, 34 tuig ang edad, pangkabilugan nga sekretaryo sang Karapatan-Southern

Mindanao. Mga alas-10 sang aga, naglunsar sang *press conference* ang 1003rd Bde sang Philippine Army sa pangunguna ni Brig. Gen. Eduardo del Rosario kag Datu Ruben Labawan sa Apongcola, Anda St., Davao City. Si Labawan isa ka ahente sang militar kag ang lider sang *alamara* (inaway sang mga tribo) sa Paquibato, Davao. Direkta nga gin-akusahan sang heneral si Delgado nga may tagapadihot sa planong pagpatay kay Eastern Mindanao Command Spokesman Lt. Col. Randolph Cabangbang.

Ginaduso ni Del Rosario sa iya nakuha nga *affidavit* sa isa ka saksi nga may tatlo ka tawo nga myembro sang BHB nga ginmanduan ni Delgado para patyon si Cabangbang. Ginsiling man niya nga ang Karapatan kag Bayan Muna prente nga organisasyon sang BHB. Isa ka report man ang nabaton sang Karapatan nga may plano nga patyon si Delgado kag targeton sang kontra-insurhensyang programa sang gubyerno. Ginapasakaan si Delgado sang mga himu-himo nga kaso kag gin-upod sa *order of battle* sang 10th ID.

Septyembre 21. Ginlakip sang AFP Southern Command sa OB sini si Criselda Cabangon-David, 27 anyos, nagatindog nga editor sang simanal nga *Ang Diaryo Natin*. Si David ang nagtukod sang tsapter sang National Union Journalists of the Philippines (NUJP) sa Quezon kag siyang pangkabilugan sekretaryo sini. Suno sa isa ka impormante sa militar, si David nakalista bilang upisyal sang BHB sa Quezon. Anay lider estudyante kag mamahayag sa kampus sa Enverga University sa Lucena City si David. Kilala sa iya maisog nga artikulo abusado nga





mga tawo kag para sa mangunguma nga nagaduso sa ila kinamatarang sa duta.

Septyembre 13. Gindukot sang mga suldado sang 36th IB sanday Ranato Deleguer kag Agustino Ladera, mga mangingisda halin sa Marihatag, Surigao del Sur. Naka-balita ang mga pamilya nila nga gindala kuno sila sa istasyon sang pulisya sa Tandag, kapital sang Surigao del Sur, para idetine. Pero ginhimutig ini sang PNP. Ginbaliskad pa sang 36th IB ang hitabo kag ginsiling nga BHB kuno ang nagdukot sa duha ka biktima.

Septyembre 12. Ginpatay sang mga elemento sang 50th kag 86th IB si Elmer Valdez, 33, mangunguma kag residente sang Conconig East, Sta Lucia, Ilocos Sur. Nakit-an ang iya nagakadunot na nga bangkay sa isa ka manabaw nga buho tatlo ka adlaw matapos siya madula.

Ginpahog kag ginbalagan sang militar ang iya pamilya, mga upisyal sang baryo kag mga tiglawas sang *non-governmental organizations* sang pangitaon ang bangkay ni Valdez. Nagkadto si Valdez malapit sa bukid para magkuha sang kawayan para gamiton sa pagkumpuni sang ila kusina mga alas 10:00 sang aga sang dakpon siya sang militar kag akusahan nga BHB.

80 adlaw, 8,000 biktima

Naglab-ot na sa 90 ka kaso sang paglapas sa tawhanong kinamatarung ang ginreport sa Mindanao paglab-ot sa ika-80 adlaw sang pagpungko ni Benigno Aquino III. Suno kay Jorge Madlos, tagapamaba sang National Democratic Front-Mindanao, nagaabot sa 8,000 indibidwal ang biktima sa mga kaso nga ini.

Sa Southern Mindanao Region (SMR) kon sa diin sobra 12 batalyon sang AFP ang nagapanghalit, ginreport ang 42 ka kaso sang paglapas sa tawhanong kinamatarung nga nagbiktima sa 7,721 residente.

Sa North Eastern Mindanao Region (NEMR), ginlista ang 41 kaso sang lain-lain nga tipo sang paglapas sa tawhanong kinamatarung. Nagaabot sa 286 pamilya o 1,252 indibidwal ang biktima sang mga kaso nga ini. Tampok diri ang pagbakwit sang 300 pamilya halin sa mga baryo sang Surigao del Sur, Agusan del Norte kag Surigao del Norte tuga sang grabeng operasyon militar sa lugar.

Sa Far South Mindanao Region (FSMR), may pito ka kaso sang paglapas sa tawhanong kinamatarung, upod ang pagpanglugos, pagpangawat kag ilegal nga pag-aresto sadtong Hulyo kag Agosto.

Samtang, duha pa nga mga mangunguma ang ginharas kag gin-akusahan sang militar nga mga myembro sang BHB. Nagakuha sadto si "Neil" sang kawayan sang dakpon siya sang mga nagpapatrulyang suldado. Ginpahog siya kag ginpasibangdan nga katapu sang BHB. Amo man ang natabo kay "Ben," 60, nagabantay sang iya baka. Mabaskog niya nga ginpanginwala nga siya katapu sang BHB. Gindeteni pa siya sang apat

ka oras bag-o buy-an.

Septyembre 7. Ginmasaker sang mga elemento sang 9th ID ang apat ka katapu sang Masbate People's Organization. Sanday Vicente Flores, 41; Richard Oliva, 44; Melecio Monacillo, 45; kag Jonathan Monacillo, 21, nagapahaway sa balay sang isa ka abyan sa Mobo, Masbate sang paulanan sila sang bala. Ginpagwa sang militar nga mga gerilya sila sang BHB nga napatay sa engkwentro. **AB**

10 ka adlaw nga aksyon protesta para sa reporma sa duta

Napulo ka adlaw nga aksyon protesta ang gin-umpisahan sang mga mangunguma sining Septyembre 29 para iduso sa rehimeng Aquino ang pagpatuman sang reporma sa duta. Ang ulihi nga adlaw sang protesta ginsanto sa ika-100 adlaw sa poder sang bag-ong rehimen sa Oktubre 8.

"100 ka adlaw ni Noynoy Aquino, wala sang pulos sa mangunguma!" siling sang plakard samtang ginasnog sang mga katapu sang Kilusang Magbubukid ng Pilipinas (KMP) kag mga kadampig sini nga grupo sang mangunguma ang 100 litrato ni Aquino sa atubang sang DAR sa Quezon City sang Septyembre 29. Simbolo ini siling nila sang pagpamatuk sa mga poli-

siya sang gubyerno subong nga kontra-mangunguma kag kontra pumuluyo, suno kay Antonio Flores, tagapamaba sang KMP.

Sang Oktubre 6 nagmartsa ang mga mangunguma halin sa DAR pakadto sa Mendiola kon sa diin mapintas sila nga gindispers sang mga pulis. Indi magnubo sa pito raliyista ang ginsakit bangud sa mga lampos sa ulo. Nagbalik liwat sila pagkaaga para padayunon ang ila nga protesta.

Samtang nanawagan sanday Lito Bais, temporaryo nga presidente sang United Luisita Workers Union kag Felix Nakpil, presidente sang Alyansa ng mga Manggagawang Bukid sa Hacienda Luisita (AMBALA), nga da-


pat hugot nga bantayan ang mga maniobra sang gubyernong Aquino pabor sa pamilya Cojuangco-Aquino. Tuga ini sang pagsuspendi sa pagbista sang Mediation Panel sang Septyembre 27.

Ang 3-katawo nga Mediation Panel nga gintukod sang Korte Suprema sadtong unang simana sang Septyembre may order nga maghiwat sang bista sa sulod sang 30 ka adlaw para aregluhon kuno ang pila ka dekada nga gamu sa Hacienda Luisita.

Bag-o matabo ang *deadlock*, ginsiling sang HLI sang Sept. 14 nga bukas kuno ini nga ipanagtag ang 4,100 ektarya sang kabilugan nga 6,543 ektarya nga duta sang Hacienda Luisita.

Pero ginhimo nila nga kundi syon ang pagpresyo sang duta indi base sa tantya sang Landbank nga P167,000 kada ektarya, kundi base sa pagtantya nga indi magnubo sa P1,000,000.00 kada ektarya nga ginhimo sang isa ka pribadong *real estate assesor*. Pamatuod ini nga wala sang interes ang pamilya Cojuangco nga ipanagtag ang duta sa mga mangunguma. Indi nila masarangan ang amo nga balor.

Isa ka simana antes ang dedayn, ginpundo sang Mediation Panel ang pagbista sang mag-*walkout* ang taga-AMBALA kag abugado nila nga si Joebert Pahilga. Siling nila, ginapatyug-tiyog lang sang HLI ang pagbista. Ginhingyo sang AMBALA sa Korte Suprema nga tapuson na ang bista kag ipanagtag ang duta base sa desisyon sang Presidential Agrarian Reform Council.

Pero ginbasura sang Korte Suprema ang mosyon sang AMBALA kag ginapadayon gihapon ang bista. Pila ka adlaw makaligad sini, nag-*walkout* man ang Farmworkers Agrarian Reform Movement kag abugado nila nga si Christian Monsod. Napilitan ang korte nga untaton ang bista bangud wala na ini sang maabot. 

Sukot sa tubig, magataas

DUGANG naman nga palas-anon sang pumuluyo ang pagtaas umpisa Oktubre sa sukot sang mga kumpanyang nagapanagtag sang tubig sa Metro Manila. Umpisa Oktubre 9 magabayad sang dugang nga P0.10 kada metriko kubiko ang ordinaryong konsyumer sang Manila Water Company kag umpisa Oktubre 10 magabayad man sang dugang nga P0.09 kada metriko kubiko ang ordinaryong konsyumer sang Maynilad Water.

Ginarason nila ang pagnubo sang piso kumparar sa US *dollar*, ginapasa nila sa mga konsyumer sang tubig ang pagtaas sa balayran sa interes sa ila nga mga utang sa gwa sang pungsod.

Nagaani sang mabaskog nga pagpamatuk ang bag-ong dugang nga pagpanukot, labi na ang mga kumpanya nga ini nga madaya kag abante nga magdugang sadto sang sukot nga ginapuhunan nila sa mga proyekto nga wala pa man napatuman. Upod diri ang rehabilitasyon kag pagpauswag sang Wawa Dam, Angat Dam kag Laiban Dam; Laguna Lake Treated Bulk Water Project kag Earthquake Contingency Project.

Mga aktibistang kontra-gera sa US, ginaipit

NAGAANI sang mabaskog nga pagkundena ang pagsalakay sang Septyembre 24 sang mga elemento sang Federal Bureau of Investigation sa panimalay sang mga aktibistang kontra sa gera sa Iraq kag Afghanistan kag nagasuporta sa paghimakas sang pumuluyong Palestinian kag Colombian. Ang pagpanalakay natabo sa mga estado sang Illinois kag Minnesota, USA.

Nagpanalakay ang "Joint Terrorism Task Force" sang US Department of Justice tuga sang pagpagwa sadtong adlaw man nga ina sang mandamyento para irekisa ang mga balay sang mga aktibista kag ang pagmandu nga mag-atubang sila sa korte. Ang mga gintarget nga aktibista nga nagpaguwa sang mga pampulitikang pahayag nga nagadepensa sa pumuluyo sang Palestine kag Colombia.

Ang mga biktima madugay na nga mga organisador nga nagakundena sa mga interbensyunistang gera sang US kag pagpang-ipit sini sa pumuluyo sang iba nga pungsod. Mga lider sila sang mga organisasyon pareho sang Twin-Cities Anti-War Committee, Palestine Solidarity Group, Colombia Action Network kag Freedom Road Socialist Organization.

Reporma sa pensyon sa France, ginapamatukan

LABI nga nagalapad kag nagabaskog ang pagpamatuk sang pumuluyo sa mga pagbag-o sa sistema sang pensyon nga ginaduso ni Pres. Nicolas Sarkozy sang France. Sining Oktubre 2, naglab-ot sa 2.9 milyong Pranses ang nagdagsa sa mga kalye para kundenahon ang mga polisiya nga globalisasyon lakip ang pagpataas sa edad sang pagretiro sang mga mamumugon halin 60 anyos pakadto 62 anyos.

Nagaabot sa 200 rali-protesta ang ginlunsar sa bilog nga France, suno sa Confederation Francaise Democratique du Travail (CFDT o French Democratic Confederation of Labor), isa sa pinakadaku nga pederasyon sang mga unyonista sa France. Ini sa pihak sang mabaskog nga pagbuhos sang ulan sa nakatungdan nga bahin sang pungsod kag sari-sari nga pagpamigos sa mga mamumugon para indi sila makaupod sa mga aksyon protesta.

**ANG****Bayan****Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo**

Edisyong Hiligaynon

Tuig XLI No. 19

Oktubre 7, 2010

www.philippinerevolution.net*Editorial*

Sikwayon ang rehimen nga US-Aquino

Wala na nagadulot sa pumuluyo ang “pagbag-o” nga salambiton pirme ni Benigno Aquino III. Makaligad ang 100 adlaw sa gahum, ang iya nga rehimen madasig nga nahublasan bilang papet nga rehimen nga wala sang kinalain sa mga nagligad nga reaksyunaryong rehimen. Sa atubang sang serye sang mga isyu nga naglupok sa una nga 100 adlaw ni Aquino sa Malacañang, nagaathag sa mata sang pumuluyo ang maki-imperyalista, elitista, manabaw, wala sang pulos, militarista kag garuk nga kinaiya sang pinakaubod sang iya rehimen.

Santo sa gin-areglo sang US nga kasugtanan nanday Aquino kag Gloria Arroyo, wala sang ginapakita nga kaseryosohan ang subong nga rehimen sa paglagas kay Arroyo sa daku nga krimen sini ni batuk sa pumuluyo. Ginpromisa ini ni Aquino para kuhaon ang suporta sang madamo, pero tubtob subong, ang solo nga nahimo niya tukuron ang Truth Commission para kuno mag-imbestiga. Nagaatubang ini subong sa madamo nga ligal kag iban pang sablag. Ginahatagan sini sang kahigayunan kag malaba nga tion sanday Arroyo para makahimo sang mga ligal, pulitikal kag iban pa nga maniobra para makalibre sa imbestigasyon kag pagsilot.

Isa ka bulan pagkatapos mabutang sa poder ang ila kapamilya, ginpahug, gintiplang kag ginsuhulan sang pamilya Cojuangco-Aquino ang mga

mangunguma kag mamumugon sa uma sang Hacienda Luisita para pagwaon nga may suporta ang ila madugay nga gimik nga Stock Distribution Option (SDO) para padayon nga malikawan ang pagpanagtag sang duta. Nagpakuno-kuno si Aquino nga wala sang labot sa mga padihot nga ini. Ginapakita lang niya nga wala siya sang intensyon nga isulong ang tunay nga reporma sa duta sa Hacienda Luisita kag iban pa nga asyenda sa bilog nga pungsod.

Ginahatagan niya sang dalan ang dugang nga pagpasilabot sang US kabaylo ang suporta nga pulitikal, ekonomya kag pinansyal sang US. Pabor siya sa todolarga nga kontra-rebolusyonaryong interbensyon militar sang US kag sa pagpagamit sang pungsod bilang base sang dominasyon militar sang US sa rehiyon sang Southeast Asia kag Pacific. Pabor man si Aquino sa permanente nga pagpabilin sang mga tropa pangkombat sang US sa pungsod. Wala niya ginsunod ang pangako nga kalkalon ang bahin sa Visiting Forces Agreement sang mag-atubang siya kay US Pres. Barack Obama.

Sa pihak sang mga pahayag niya para sa “kalinungan”, wala siya sang ginapakita nga seryosong interes sa pormal nga negosasyon pangkalinungan sa National Democratic Front of the Philippines. Sa baylo, naghimo siya sang kundisyon nga “untat-lupok” antes ang anuman nga pagsugilanon, nga labag sa The Hague Declaration kag iban

***Mga tampok sa
isyu nga ini...*****Engrande nga
imperyalistang
pagpaniplang** PAHINA 3**QC-CBD: Para sa
dumuluong, salot sa
pumuluyo** PAHINA 7**5 lider mangunguma,
ginpatay sang militar** PAHINA 11

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com